

ABO ta vota 100% pa Aruba??? Esey kier men cu BO lo yuda RED pa:

●	Aumenta transparencia den gobernacion, eliminando corrupcion y nombracion politico
●	Coregi overbruggingstoelage y pensioen in husto di politico
●	Goberna a base di Dialogo Nacional
●	Combati criminalidad a base di envolvimento di henter comunidad
●	Elimina problema di choller e.o. pa medio di rehabilitacion obligatorio
●	Hiba un maneho di migracion mas humano y di acuerdo cu nos potencial y necesidad economico y social
●	Aumenta inversion den enseñansa, pa ehecuta e.o. Plan Club Escolar
●	Construi scol di MAVO-HAVO na Noord y San Nicolas y mehora infraestructura di scol pa multi-uzo
●	Crea un mentalidad na unda siñamento ta un prioridad

●	Adapta salario a base di un reparticion mas husto di Entrada Nacional y aumento di productividad
●	Garantisa un sistema di pensioen (general) duradero
●	Modifica BBO den uno no-cumulativo
●	Amplia tarifa social di WEB y Elmar pa inclui mas grupo di recurso limita
●	Garantisa un sistema di cuida general duradero: integra AZV-SVB
●	Amplia y renoba nos hospital, e.o. cu clinica psiquiatrico adecua y centro di revalidacion.
●	Amplia e cuida pa nos grandinan y pacientnan cu Alzheimer y Parkinson.
●	Aumenta participacion na deporte y cuida nos medio ambiente, uzando e.o. mas energia alternativa
●	Construi caminda pa bicicleta, e.o. dentro di e Plan 'Linear Park Aruba'.



Of di berdad BO ta sigui vota pa esNAN cu ya a abusa di BO confiansa?

BO ta djis vota pa un CAMBIO di cara, lagando e circo mescos?

BO ta kere di berdad cu esNAN cu a causa tur problema, e biaha aki si lo trece solucion?

BO tin e curashi pa scohe pa un maneho completamente inovativo?

BO ta duda ainda? Anto sigui informa BO mes riba e siguiente paginan!

*Tuma BO tempo y compara e programa y mensahenan aki cu esunnan di otro partido prome cu BO dicide!
També BO por baha esaki for di nos website www.red.aw*




UN PENSIOEN SIGUR?!

Aña 1960 a introduci e Fondo di Pensioen di SVB. E sistema tawata basa riba e principio di solidaridad: esun cu ta traha awor, ta paga un premie (di 7,2%) riba nan salario pa esnan cu ta ricibi e pensioen. Pa tur hende, e pensioen tawata mescos: Af. 411,- pa soltero y Af. 692,- pa pareha. E sistema aki, yama 'omslagstelsel', ta diferente for di e sistemanan di spaar, manera esun di APFA, na unda cada persona ta spar durante hopi aña pa su propio pensioen (Kapitaaldekking). Den curso di e ultimo 33 añanan, nos politiconan a torno na e principionan di e fondo di solidaridad aki, mayoria di biaha puramente pa motibonan electoral. Resultado ta, cu e metemento di politica den e sistema di pensioen aki a perhudica e salud financiero di e Fondo di Pensioen. Si sigui negligisha esaki, e pensionadonan tin tur motibo pa teme cu nan pensioen lo core peliger den un futuro basta cercano. Kico tur a pasa?

- Na 1975 a baha edad di pensioen di 65 pa 62 aña.
- Na 1992 a sigui baha e edad di 62 pa 60 aña. SVB y KPMG a adverti cu esaki lo hinca e fondo den problema.
- Na 1993 gobierno di MEP a aumenta pensioen cu 40%.
- Na 1994 gobierno di AVP a redobla e pensioen original. A subi e premie di 7,2 pa 11,5%.
- Na 1994 SVB y KPMG a adverti cu e iniciativanan di e 2 gobiernonan lo conduci na bancarota di e Fondo.
- Na 1998 Gobierno di AVP ta sigui aumenta pensioen, esta di Af. 822,- pa Af. 900,- y di 1384,- pa Af. 1516,-.
- Na 2005 International Labour Organisation a investiga salud di e Fondo y a adverti seriamente cu mester tuma accion riba varios tereno pa salbuarda e Fondo.
- A base di e raport, un grupo di experto di Aruba a manda Gobierno di MEP un lista cu varios recomendacion. Gobierno a negligisha mayoria di e recomendacionnan aki.
- Na 2008 a bira cla pa experto, cu e Fondo ta core un peliger hopi grandi pa un bancarota dentro di 6 aña:
- E deficit di SVB ta bira cada aña mas grandi (di 9 miyon florin na 2008 te na 100 miyon florin na 2016)
 - * Cada aña e cantidad di pensionado ta crece na un manera accelera. Esaki ta rekeri hopi placa extra.
 - * Dor di esaki e reserva di SVB ta mengua hopi lihe: di 190 miyon na 2005 pa 180 miyon na 2008.
 - * Mirando e deficit creciente di SVB y e reduccion accelera di SVB, por calcula cu e Fondo lo keda bashi na 2015 y cu e entradanan di premie no ta cubri gran parti di e pensioennan.

Mientrastanto nos politiconan (di AVP y MEP) no a sinta completamente keto. Salbuardando NAN pensioen, NAN a crea un sistema 'ilegal' di pensioen pa NAN mes. Awor ta resulta, cu despues cu NAN e regla NAN pensioen, ya no ta resta placa pa BO pensioen!

- Pensioen di Afl. 11.000,- pa luna pa cada ministro cu a cumpli 45 aña di edad, despues di 4 aña di trabou y sin nunca paga 1 cen di premie.
- Pensioen di Afl. 8000,- pa luna pa parlamentario for di 50 aña di edad y despues di 12 aña di 'trabou'.
- Acumulacion di varios pensioen riba otro. Asina por cobra mas pensioen cu a cobra na salario.
- Overbruggingstoelage di mas di Afl. 100.000,- den un solo tiro, irrespecto cu ta sigui cobra di biaha un salario mas halto.
- TUR ESAKI TA BAY CONTRA E ESPIRITO DI E LEYNAN DI PENSIOEN CU TA CONTA PA TUR OTRO HENDE NORMAL NA ARUBA!
- TA RED SO TA CUESTIONA Y BRINGA CONTRA E ABUSO AKI, MIENTRAS NAN TUR TA BRINGA PA PROBECHA DI DJE!!!



VISION DI RED: 100% NA INTERES GENERAL DI PUEBLO DI ARUBA

E vision di RED ta pa realisa un Aruba den cual gobernacion realmente ta traha pa un desaroyo duradero na interes general di e comunidad. Esey ta ensera un gobierno cu ta funciona di un forma transparente y asina duna cuenta pa su actonan na e comunidad y su ciudadanonan. E ciudadano di e pais Aruba tin confiansa den e comportacion di su gobernantenan profesional pasobra nan ta wordo supervisa y controla dor di un Parlamento critico. RED ta visualisa cu Aruba por bira un modelo di un pais di bon gobernacion pa resto di Reino y mundo, pero principalmente pa su mesun ciudadanonan. Mescos cu Aruba tabata e prome pais den historia di Reino pa a realisa un Status Aparte, awor Aruba lo bira e prome pais den Reino cu un forma di gobernacion cu realmente ta traha 100% na interes general di e comunidad Arubiano. A base di e vision aki, RED lo enfoca na yuda desaroya Aruba na un pais cu:

- Ta ofrece su ciudadanonan e posibilidad pa desaroya nan potencial mas cu ta posibel (Enseñansa di calidad halto).
- Ta stimula y reta su ciudadanonan pa asumi nan propio responsabilidad pa cu nan propio desaroyo y di comunidad, e.o. pa vigila calidad di gobernacion (Ciudadano critico cu curashi).
- Ta garantisa su ciudadanonan e libertad pa expresa nan opinion y conviccion sin cu esaki tin repercusion pa su bida y/of trabou (Ta duna e derecho liber di expresion contenido).
- Ta duna su ciudadanonan un bista completo y liber den su maneho y cu ta duna comunidad e confiansa cu ta hiba un gobernacion integro y di calidad halto (Derecho riba bon gobernacion y transparencia).
- Ta structura finansas publico a base di un maneho financiero y economico sano di tal manera cu ta garantisa e obligacionnan financiero riba termino corto y largo (manera e obligacionnan di pensioen), y cu ta duna economia e estimulonnan necesario pa sigui desaroya na un manera duradero (Finansas publico sano).
- Ta duna su ciudadanonan e tranquilidad y libertad pa ta na cualke lugar na Aruba, sin tin miedo pa seguridad di su pertenencia y persona (Derecho riba proteccion contra criminalidad y trafico peligroso).
- Entre otro a base di solidaridat, ta elimina situacion social deplorable na un manera structura (Husticia social).
- Ta crea situacion asina favorable pa su ciudadanonan cu nan mes ta involvi y alabes ta aporta na mantencion y/of mehoracion di nan propio salud (Participacion masal na deporte y salud preventivo).
- Ta involvi representante di grupo importante den nos comunidad for di inicio di e proceso di decision a base di e principionan di Dialogo Nacional (Institutionalisa Dialogo Nacional).
- Ta percura pa su necesidadnan energetico na un manera mas independiente posibel, haciendo uzo maximo di su propio fuentenan energetico natural (Desaroyo di energia duradero).
- Ta purba realisa tur e puntonan ariba menciona den relacion cu un concientisacion di importancia y consecuentemente mantencion y/of mehoracion di naturalesa y medio ambiente di Aruba (Principio di desaroyo sostenibel)

Tur esaki ta dirigi na optimalisa calidad di bida di tur ciudadano y ta basa riba e siguiente puntonan di salida:

- RED Democratico ta stimula e desaroyo individual di cada ciudadano na Aruba. e desaroyo aki ta enfoca na optimalisa e independencia y propio responsabilidad di ciudadano. Den esaki e ciudadano no ta enfoca solamente riba su mes, pero ta aporta tambe na desaroyo di comunidad a base di solidaridat.
- Comunidad ta respeta cada individuo y/of grupo di interes y ta dun'e e derecho pa aporta na desaroyo di comunidad a base di e principionan di democracia participativo. E desaroyonan continuo ta tuma lugar a base di e principionan di sostenibilidad di e medionan disponibel.
- Gobierno ta limita su mes na un rol stimulativo y coordinativo. Den tur su decisionnan, desde un principio den e proceso di toma di decision, e ta tene debido cuenta cu aporte di tur esnan involvi den comunidad. Den tur su labornan, su guia principal lo ta e principio di 'Excelencia'. E ta ehecuta su tareanan na un manera corecto, efectivo y eficiente y cu un maneho estricto di e medionan financiero cu pueblo a pone cu confiansa na su disposicion. E ta transparente y semper dispuesto pa responsabilisa su maneho. Parlamento ta hiba un control estricto y efectivo riba funcionamiento di Gobierno.

ARUBA NA CAMINDA PA INTEGRIDAD DEN GOBERNACION

INTEGRIDAD DEN GOBERNACION

Bon gobernacion ta esencial pa reparti e bienestar na Aruba na un manera social responsabel. E falta di integridad cerca gobernante ta un obstaculo grandi pa realisa bon gobernacion. RED kier logra un funcionamiento integro di parti di gobernante dor di:

- Implementa e concepto di Ley di Financiamiento di partido politico.
- Implementa di berdad e Ley di responsabilisacion civico y penal di Ministro.
- Introduci ley pa limita a lo maximo corrupcion den Gobierno.

BON CALIDAD DI GOBERNACION

E sistema di patronahe politico, combina cu e labor pa sirbi propio interes di parti di politico, ya caba pa varios decada ta obstaculisa un desaroyo balansa di Aruba. RED kier logra realisa un cambio necesario di mentalidad dor di:

- Concientisa comunidad cu ta sirbi e propio interes mihor dor di sirbi interes general prome.
- Implementacion real di 'Raport Calidad' y otro raport cu a traha pa mehora calidad di gobernacion.
- Elimina e posicion huridico discriminatorio (p.e. pensioen inhusto) di e ministro- y parlamentarionan.
- Reforsa e funcion di iniciativa y control di Parlamento, ademas di su produccion general, eliminando e interrupcionnan frecuente pa motibo di viahe pa Parlatino.
- Evaluacion obligatorio di cuentanan anual dor di Parlamento, prome cu trata presupuesto.
- Pone criteria pa cu experticio y integridad di ministro y efectua combinacion di departamento 'logico'.
- Reforsa Servicio Central di Accountant y Controloria General y pone nan raport disponibel pa publico.
- Institui un 'Comision Nacional pa Empleado Publico' cu ta encarga cu nombracion y promocion di personal

a base di necesidad y competencia real y e control di e stipulacionnan legal al respecto.

- Aumento di calidad di servicio di Gobierno a base di programa di formacion y motivacion di personal.

ARUBA Y SU RELACION CU UNION EUROPEO

Segun ley internacional, solamente pueblo di un pais por dicidi pa su futuro estatal pa medio di un referendum. RED no ta pro e status di UPG, sino ta promove un cooperacion mas intensivo cu Union Europeo a base di e principianan di e 'Groenboek' manera proponi dor di RED y acepta unanimamente dor di MEP-AVP-MPA pasobra:

- Aruba ta para mas fuerte den mundo, participando den un bloke mas grandi. Esaki ta importante pa e lucha contra criminalidad organisa y pa seguridad economico y militar;
- Ta mantene nos pasaporte hulandes den combinacion cu ciudadanía Europeo;
- Ta garantisa nos Estado di Derecho na unda Husticia ta funciona independiente di 'politica';
- Ta garantisa un clima di inversion atractivo pa inversionista;
- Ta expande e cuadro Legal social y di medio ambiente pa mehora nos calidad di bida;
- Ta bin na remarca pa varios fondo pa mehora infraestructura, diversificacion di economia, pa enseñansa y salubiridad publico;
- Ta sigui mantene Status Aparte y 'ciudadania igual' dentro di Reino Hulandes.

Pesey RED lo sigui e deliberacionnan cu Union Europeo pa logra un cooperacion beneficioso pa tur partido involvi a base di acuerdo bilateral na unda ta tene cuenta cu e posicion special di Aruba.

**NO TA LOGRA IMPONE UN IMAGEN DI INTEGRIDAD
SI ESEY MESTER DEPENDE DI
MEDIONAN DI COMUNICACION COMPROMETI
CU TA DISPUESTO PA SILENCIA OF TROCE E BERDAD
PA INFLUENCIA OPINION PUBLICO!**




UN MANEHO RESPONSABEL DI FINANSAS PUBLICO

E situacion financiero di Aruba ta preocupante a pesar di hopi aña di prosperidad economico. Esaki ta consecuencia di mal gobernacion, patronahe politico y corrupcion. RED lo sania finanzas publico a base di e siguiente puntonan di salida y accionnan:

- Institui ley y regla cu lo prescribi un presupuesto balansa sin deficit y un Debe Nacional responsabel.
- Prescribi e transparencia y responsabilisacion di presupuesto cu Gobierno mester mantene na dje.
- Mehora e sistema di audit pa asina salbuarda salud di nos finanzas publico.
- Restructura e Debe Nacional di Aruba segun condicionnan mas faborabel.
- Restructura inversion gubernamental riba tereno di enseñansa, structura social, medio ambiente, salubiridad publico y ordenansa territorial pa medio di (un alternativa di) Fondo Desaroyo Aruba.
- Baha e gastonan inecesario di Gobierno, e.o. pa medio di un analisis y eliminacion di tur tarea y gasto di Gobierno cu no ta aporta na interes general y desaroyo di Aruba (e.o. a base di e Kerntaken-analyse).
- Hiba un maneho financiero a base di e principionan di bon gobernacion (transparencia y control), segun presupuesto realistico y segun e necesidad- y posibilidadnan di pais Aruba y no di e necesidad politico pa sobrevivir.
- Mehora e administracion di departamento di tal forma cu cada cuartal por tin un bista real di e situacion financiero di Aruba y cu por publica e Cuenta Anual dentro di 3 luna di e aña nobo.
- Adapta e posishon huridico di ministro y parlamentario, enfocando riba eliminacion di e areglo di pensioen inhuerto y discriminatorio, incluyendo e acumulacion di pensioen y overbruggingstoelage.
- Minimalisa e cantidad di contratonan cu consultant, haciendo mas tanto posibel uzo efectivo di e propio personal.
- Aumenta productividad y efectividad di e aparato gubernamental.
- Stipula pa medio di ley e cantidad maximo di ambtenaar pa cada departamento.
- Envolvi e grupo grandi di empleado publico sinta na cas den produccion laboral.
- Transforma e BBO-cumulativo actual den uno no-cumulativo.
- Simplifica e sistema actual di impuesto y elimina burocracia inecesario pa inversionista.
- Aumenta inversion di Gobierno den economia di Aruba, e.o. den propio edificio pa Gobierno
- Hiba un maneho estricto di mantencion di propiedad di Gobierno.
- Crea incentivo pa Pensionado.

NOS tur ta PAGA
Afl. 350.000,- pa DIA
solamente na INTERES
riba e DEBE cu NAN
a causa sin necesidad!

Cuanto bancarota mas
BO kier pa NAN
causa prome cu
NOS TUR bay bancarota?



TURISMO Y MANEHO ECONOMICO DURADERO

E ultimo decadanan a limita e maneho economico di Aruba pa mayoria parti na expansion di e posibilidadnan riba tereno turistico. Di e manera aki, economia di Aruba ta hopi dependiente di specialmente turismo mericano. Pesey RED lo enfoca na amplia nos base economico, na crea empleo productivo, combina na mehoracion di e posicion di e gruponan mas vulnerabel. Un punto di salida importante ta cu e efectonan di inversion mester tin consecuencia positivo pa e poblacion, naturalesa y medio ambiente. Pa logra e metanan aki, RED lo:

- Sigui desaroya Aruba como centro internacional di servicio riba tereno financiero, comercial, turistico, transporte, comunicacion y educacion.
- Institui un 'Centraal Planburo' cu ta analisa y calcula e consistencia y coherencia di presupuesto, cambio di ley y programa di gobierno pa canalisa un desaroyo sano.
- Establece un centro financiero y comercial cu ta funciona como espacio di exposicion y bolsa.
- Mehora credibilidad di nos estado di derecho, ademas di estabilidad financiero y social.
- Defini e relacion cu Union Europeo a base di e 'Groenboek' cu tur partido a acepta unanimamente.
- Mehora calidad di enseñansa como base pa diversificacion di nos economia.
- Simplifica y acelera e proceduranan pa inversionista local y internacional.
- Consolida e situacion actual di hotel grandi cu posibilidad di 'boutique hotel' di inversionista local.
- Ehecucion di e proyecto di AHATA, esta e "Parke Linear", cu expansion te cu San Nicolas.
- Promocion di 'industria artesanal y cultural' pa e mercado turistico.
- Duna incentiva na doño di edificio historico valioso pa renobacion y mantencion di nan propiedad.
- Promove guia administrativo na e inversionista local chikito pa medio di entidad renombra.
- Crea un fondo di garantia pa yuda e inversionista local chikito pa cuminsa su empresa.
- Inclui SER mas intensivo den maneho di mercado laboral.
- Expansion y mehoracion di Servicio di Post y Comunicacion (Setar).
- Promove estabilidad pa tarifa di awa y energia, ademas di descentralisacion di produccion di energia.
- Reduci e dependencia riba crudo mas cu ta posibel dor di diversifica produccion di energia alternativo.
- Aumenta experticio local pa cu energia alternativo.
- Formula criteria nobo pa construccion, a base di e uzo mas eficiente di posibilidad y limitacion climatologico
- Promove construccion di renbak (regenbak) den comunidad pa produccion di propio alimentacion.
- Sania Seguro Social y introduci un pensioen general den estrecho cooperacion cu e partnernan social.
- Promove un sistema salarial cu ta participa na un manera husto den crecemento di e Entrada Nacional y pues ta crece segun aumento di productividad.

Expansion di economia ta unicamente posibel si ta trata e espacio disponibel y otro factor di medio ambiente na un manera cuidadoso y visionario. Pa nos sobrevivencia economico y social, nan ta di sumo importancia. Pesey tambe ordenansa teritorial y proteccion di medio ambiente lo hunga un papel importante den tur decision di Gobierno. Lo fiha e maneho pa un gran parti riba e puntonan di salida y e metanan, manera formula dor di 'Wildlife Congress'.

E ultimo 20 añanan, economia di Aruba a produci hopi placa.

Asina mes, NAN a laga di inverti 100% di e placa ey den progreso di Aruba.

NAN a prefera di uza e placa di pueblo pa recompensa esnan cu a core campaña pa NAN.

Cu BO voto conciente BO por evita cu historia ta ripiti atrobe!



MANEHO LABORAL Y SOCIAL

Ley y debenan laboral ta anca den nos leyman. Ley laboral ta regla e.o. orario di trabou, condicion y salario. RED ta enfoca na mehora e posicion huridico di trahador, mara na aumento di productividad. A base di e principio aki lo:

- Introduci gradualmente un 'Areglo General di pensioen';
- Promove expansion cuantitativo y cualitativo di e sistema di creche y ofrece incentiva na empresa cu ta ofrece e servicio aki na nan empleado;
- Promove e posibilidad pa mama den periodo di lactancia, por 'kolf' lechi durante di ora di trabou;
- Controla severamente eheccion debido di nos leyman laboral;
- Promove orario y lugar di trabao flexibel;
- Promove iniciativa, creatividad y propio responsabilidad di parti di trahador pa excela;
- Desaroya programa formativo pa trahador den cooperacion cu gremio comercial y sindical.

Ta esencial pa Aruba desaroya un maneho social cu ta enfoca na reduci y asta elimina e abuso di alcohol, na mehora e abilidadnan comunicativo di pareha y mayor y na fortifica e abilidadnan necesario y sentido di responsabilidad pa funciona como un bon ciudadano. Pa logra esey, RED lo:

- Hiba campaña intensivo pa concientisa comunidad di e efectonan negativo di abuso di alcohol (y tur otro substancia adictivo) y introduci medida pa discursasha uzo excesivo di alcohol;
- Sostene e esfuersonan di organisacion social y religioso cu ta enfoca na fortifica e nucleo familiar;
- Propaga e nucleo familiar pa promove norma y valor positivo den nos comunidad;

- Ehecuta e Plan Club Escolar pa un formacion saludabel y responsabel di hubentud;
- Promove ayudo na mayor pa medio di 'Telefon pa Mayor' y SOS.
- Mehora e nivel di onderstand pa esnan cu no tin ningun posibilidad pa haya trabou pa motibo di nan deficiencia fisico of mental;
- Duna oportunidad den un fase transitorio pa sigui ricibi onderstand mientras ta studia durante un tempo limita pa mehora e abilidadnan. Den tur otro caso, ta mara recibimento di onderstand na servicio na comunidad pa asina facilita entrada of regreso den e proceso laboral;
- Stimula atencion pa nos grandinan y muchanan descuida;
- Mehora e relacionnan den y sentido di responsabilidad social pa comunidad dor di mantene y aña di facilidad deportivo y recreativo den bario;
- Promove participacion di hubentud den trabou voluntario den organisacion riba tereno di recreacion. Ta haci esey a base di e principio: hubentud pa hubentud;
- Promove participacion di hoben den trabou di fundacion den e propio bario;
- Promove intercambio di e diferente culturanan den nos comunidad;
- Promove trabou di fundacion den comunidad dor di canalisa mas medio financiero for di programa di gobierno menos efectivo pa e fundacionnan y stimula nan pa traha lo mas eficiente posibel.
- Elimina e motibonan cu ta conduci na e diferente forman di pobreza den nos comunidad.

- Biahe den primera clase cu ta costa pueblo decenas di mil florin sin duna ningun resultado.
- US\$ 400,- pa dia pa e parlamentario-turista pa 'gasto di representacion' anke e gastonan real ta resulta hopi menos.



- Nunca ta duna cuenta di e biahenan mientras cu trabou di Parlamento ta keda paralisa.

Pesey RED lo elimina e drispidimento di placa aki y traspa e fondonan di 'Paranda Latina' pa fundacion specialmente dirigi na mucha y anciano pa asina nan por mehora nan servicio substancialmente.



BO kier sigui sufri mientras cu NAN ta sigui goza?



PLAN SALUD INTEGRAL

Salubridad publico mester ta enfoca na preveni enfermedad y mantene cuidu y e nivel di salud riba un standard optimal. Su calidad ta determina e salud fisico y mental di habitante di nos pais. Mirando e situacion actual di salud di poblacion di Aruba, ta claro cu e maneho cu a hiba e ultimo decadanan no a duna resultado. Un motibo importante ta cu a enfoca primordialmente riba curacion di hende en bes di riba preveni malesa, na unda ta concientisa hende di e diferente facetanan di nan salud y di nan propio responsabilidad pa mantene y/of mehora nan salud.

E inversion riba e tereno aki awor lo resulta den un economisacion hopi mas grandi pa cu e parti curativo despues. A base di e principio aki, mester enfoca na evita cu enfermedad por bira cronico, locual ta aumenta gasto di salubridad publico grandemente. Pa logra esey, RED lo:

- Introduci programa di concientisacion y prevencion (den colaboracion cu fundacion) pa cu tema manera sobrepeso, diabetes, colesterol, presion halto, atake di curason, cancer, uzo di cigaria y alcohol, enfermedad di riñon, enfermedad venerico. Lo intensifica programa pa cu salud na schol.
- Desaroya protocol di prevencion y accion riba tur e terenonan menciona (p.e. Plan Nacional di Diabetes, Stroke, Cancer di Pecho, Prostaat, etc.)
- Controla y sanciona tur e influencianan negativo pa salud (a base di ley existente y/of nobo): di gas (dor di industria y trafico), di insuficiente higiena (dengue), di uzo di alcohol pa menor di edad. Lo uza e ingreso di e sancionnan pa yuda finansia e programanan di prevencion y control.
- Elimina propaganda pa producto cu ta afecta salud negativamente (fast food, alcohol, cigaria).
- Stimula actividad fisico den naturalesa dor di construccion di parke (activo), caminda pa bicicleta, etc
- Promove salud di hende grandi mas cu ta posible dor di actividad fisico y mental te na edad halto.

RED no lo enfoca solamente riba salud di hende, pero tambe riba salud di e departamentonan di Salubridad Publico y nan organizacion, ademas di AZV. Pa logra esey, RED lo:

- Deshaci di e sistema actual na unda un solo persona tin varios function contradictorio di maneho y control locual ta obstaculisa transparencia.

- Elimina monopolio di AZV, na unda ta busca e mihor combinacion cu SVB y seguro priva. Conhuntamente esakinan lo sigui busca manera pa desaroya cuidu medico efectivo y economico.
- Renoba y amplia e hospital actual, e.o. cu centro psiquiatrico mas amplio, centro di revalidacion y centro pa parto.
- Reorganisa e facilidadnan di 'cuido inicial' (1e lijnszorg) di tal forma cu lo uza e recursonan actual na un forma mas eficiente pa asina reduci e temponan di espera y preveni e incidentenan lamentabel mas tanto posibel.
- Mehora e servicionan medico basal na Centro Medico San Nicolas.
- Actualisa e 'cuido di ambulance' riba tereno di protocol, reanimacion, aparato medico y medicamento.
- Desaroya un maneho hopi mas eficiente y efectivo pa trata paciente, tanto na hospital y dokter di cas.
- Den combinacion cu Asuntonan Social, amplia e cuidu pa hende di edad e.o. cu dokter specialisa y cas di anciano mas adecua.
- Ehecuta maneho pa guia drogadicto ambulante den centro aisla for di comunidad. Lo haci esaki den cooperacion cu fundacion y organizacion local y internacional.
- Promove creacion di un organizacion pa defende interes di paciente.

Hopi importante pa salud di hende ta calidad di naturalesa y medio ambiente. E crecemento desproporcional di poblacion di Aruba a afecta naturalesa y medio ambiente (tanto riba tera, den aire y den laman) na un manera negativo. RED lo combati e desaroyo aki dor di:

- Hiba un campaña di concientisacion intensivo pa cuida nos naturalesa y medio ambiente.
- Desaroya y implementa ley pa proteha naturalesa y medio ambiente (p.e. elimina saco di plastic).
- Envolvi organizacion di ciudadano pa promove salud di naturalesa y medio ambiente.
- Desaroya programa di concientisacion y sentido di responsabilidadacion pa scol.
- Desaroya programa pa para degeneracion di nos naturalesa y medio ambiente y pa mehora su estado actual.

Salubridad publico ta mucho importante pa purba saca probecho politico riba lomba di paciente. Pesey RED lo involvi tur partido, fundacion y organizacion riba tereno di cuidu den desaroyo di un maneho di salubridad publico sostenibel.

AVP a introduci AZV pa motibonan electoral y contra consejo. Esey a causa fayos grandi den presupuesto di Aruba y hopi abuso di varios partido den e sistema (paciente, dokter, botica).

MEP a adapta e sistema, bahando gasto y calidad di cuidu, mientras ta hiba un maneho hopi cuestionabel..



UN ARUBA SIGUR

Segun e Analisis di Criminalidad di augustus 2007, e situacion di delito riba tereno di trafico, robo, violencia, medio ambiente, moral, integridad, arma y droga, imigracion ilegal, labamento di placa problematica di choller y hubentud ta hopi preocupante. Si no cambia e maneho, no por garantiza seguridad na Aruba.

E aparente falta di integridad den e aparato gubernamental, di e nivel di mas halto te esun di mas abou, ta un preocupacion importante di RED. Mirando e efecto negativo cu esaki tin pa funcionamiento di e instancianan gubernamental, lo hiba un maneho intensivo di informacion y prevencion, di control directo y efectivo di CAD (Servicio Central di Accountant), ARA (Controlaria General) y Parlamento.

Seguridad pa e ciudadano Arubano ta un prioridad pa RED. Esey por logra solamente cu un maneho integral. Esey kier men cu no solamente Polis y Ministerio Publico ta responsabel pa seguridad na Aruba, sino tambe instancia manera DIMAS, FCCA, FADA, Reclassering, Kinderbescherming, AHATA, Oficina di Seguridad, Oficinan di ayudo pa victima, pero tambe e ciudadano arubano ta copera na crea un ambiente sigur na Aruba. Pa aumenta seguridad na Aruba mas ainda RED lo:

- Stimula e disponibilidad di ciudadano pa entrega keho y amplia ayudo na victima.
- Optimalisa e cooperacion entre comunidad y polis (mehora funcionamiento di 'polis di bario').
- Stimula un uzo mas intensivo di tecnologia moderno pa maneha informacion y resolve caso.
- Optimalisa cooperacion internacional entre Interpol, DEA, FBI y KPA.
- Optimalisa e cooperacion local entre Polis, Kustwacht, Warda nos costa, Douane, Imigracion.
- Duna sosten na fundacion cu ta enfoca riba prevencion (specialmente dirihi na hoben).
- Elimina influencia politico-partidista y stimula trato igual pa tur ciudadano (inclusivo politico).
- Ehecuta e mocion di RED pa 'Strafrechterlijke Opvang di Verslaafden' (S.O.V.) na unda ta saca e drogadictonan ambulante (y nan 'hotel') for di e 'bida y caya publico'.
- Crea e sistema di 'snelrecht' pa criminalidad chikito.
- Desaroya un sistema mas efectivo di castigo (di 3 biaha ta 'strike-out!').
- Pone mas enfoke riba resocialisacion di detenido den KIA. Lo adapta ley di tal forma cu lo duna detenido mas responsabilidad pa compensa e daño na e victim(nan) y comunidad.
- Introduci ley penal pa hubentud (pero lo pone mas enfasis riba maneho pa hubentud-Club escolar!)
- Adaptacion di e Ley di admicion y extradicion (LTU) y desaroya un maneho transparente di acuerdo cu ley y areglo di migracion internacional.
- Un maneho serio y efectivo contra trafico y uzo di droga y encubrimiento (cumpra cos horta)

ABO ta pro 'Ley pa un, ley pa tur?

Ta cera ladron chikito pa 6 luna despues di horta un pan, mientras cu NAN mag dedica algun ora di servicio na comunidad despues di a comete fraude y corrupcion cu miyones di florin di pueblo involvi!

BO ta laga e miyones di florin di placa di campaña ciega'BO?

No lubida cu despues di campaña NAN mester paga e placa aki bek na NAN sponsor cu hopi interes.

Ta ABO mes ta paga esaki cu BO placa di belasting pa proyecto mucho caro. Pues tur NAN regalo di campaña pa BO ta sali for di BO mesun saco.

No laga NAN sigui gaña'BO!

MOCION IMPORTANTE CU RED A ENTREGA

Den curso di e ultimo 3 añanan, parlamentario Rudy Lampe a entrega bastante mocion cu e intencion pa mehora e calidad di gobernacion y e funcionamiento di instituto importante di pais Aruba.

Pa motibo di espacio ta presenta solamente e idea principal di e mocionnan mas importante y e fecha di entrega. Ta remarcabel, cu Parlamento no solamente a aproba un gran cantidad di mocion. Mesun remarcabel ta cu Gobierno a negligencia mayoria di e mocionnan.

Den e mocionnan ta busca sosten di Parlamento pa pidi of urgi Gobierno pa:

- Institui un comision parlamentario pa hasi e preparacionnan necesario pa bin cu un encuesta parlamentario riba e proyecto di Radisson Hotel (20 april 2006).
- Cambia e leyman concerni di e beneficiarionan secundario di minister y parlamentario segun e recomendacionnan di Comision Fowler (4 juli 2006)
- Desaroya un cuadro legal pa mantene e gastonan di Gobierno y e fayonan presupuestal dentro di un margen maximo di e Producto Nacional di Aruba, segun proposicion di IMF (6 juli 2006)
- Duna Servicio Central di Accountant e autoridad pa investiga NV di Gobierno manera p.e. WEB y ELMAR (31 augustus 2006).
- Instala un comision di tarifa (di awa y coriente) cu ta tene specialmente cuenta cu nos responsabilidad social pa esnan menos afortuna (31 augustus 2006).
- Ehecuta un control administrativo detaya dor di entidad externo y independiente di Lotto pa Deporte, haciendo uzo di e propio fondonan di dicho entidad (1 september 2006).
- Desaroya e cuadro legal pa Controlaria General duna miembro di Parlamento e posibilidad pa, dentro di e margen di ley, mira cierto raport cu por ta importante pa un bon ehecucion di e tarea di control di Parlamento (4 september 2006).
- Desaroya e cuadro legal pa haci posibel pa impone rehabilitacion obligatorio na drogadicto ambulante cu a comete delito causa pa nan situacion di drogadicion (14 september 2006).
- Produci un areglo pa proteha 'whistleblower' (14 september 2006)
- Pone un relacion estrecho entre e legislacion nobo di construccion cu e legislacion nobo di ordenanansa teritorial y pa tene esey na cuenta for di awor caba (11 oktober 2006).
- Convince Gobierno di Hulanda pa continua e cooperacion financiero despues di 2009 pa asina garantiza un nivel aceptabel di servicio social pa comunidad (5 juni 2007).
- Renova y amplia Hospital Dr. Horacio E. Oduber na Eagle (7 di juni 2007).
- Garantiza e integracion di e personal existente di Instituto di Cultura den Directie Cultuur y di sigura cada trahador actual di Instituto di Cultura un empleo digno como funcionario publico na servicio di Pais Aruba (4 september 2007).
- Duna asistencia financiero na e famianan cu yiu cu limitacion fisico serio y cu ta carga un peso hopi grandi pa e cuida special di e muchanan aki (18 september 2007).
- Inicia un estudio cu ta hiba na e realisacion di e proyecto di caminda pa bicicleta saliendo for di California Lighthouse te na Seroe Colorado Lighthouse pasando via Savaneta (18 september 2007).
- Cobra e premienan cu minister no a paga ainda pa nan pensioen cu forsa retroactivo y investiga e posibilidad huridico pa cobra bek e pensioen y overbruggingstoelage cu minister a cobra 'ilegalmente'. Si resulta cu esey ta posibel, lo mester calcula y cobra bek e entrananan no-legitimo di e ex-ministernan. (20 september 2007).
- Dicidi cu mester hisa e edad di pensioen di minister y parlamentarionan di 45 resp. 50 aña pa 60 aña (es decir cu ta aumenta e edad di pensioen pa minister y parlamentario na 60 aña), prome cu cuminsa hasi ahuste na e edad di pensioen di e ciudadano (11 december 2007).
- Studia e alternativa di transforma Lotto pa Deporte den Lotto pa Deporte, Cultura y Naturalesa (17 december 2007).



- Den cuadro di un manera mas efectivo di uzo di placa di comunidad y un trato mas digno di animal na Aruba, pa revisa e maneho en cuanto eliminacion di 'animal indesea' den e asina yama 'camber di eliminacion' na Wayaca (19 december 2007).
 - Inicia un estudio cu ta hiba na realisacion di un estructura cu ta un alternativa atractivo pa duna hubentud di Aruba actividad sano, civico, artistico y recreativo, ademas di ayudo pa 'huiswerk' bou di guia profesional den ora di atardi (22 di januari 2008).
 - Declara e area di minanan di fosfaat den region di Sero Colorado (tambe conoci como mina di Guamo) como area di naturalesa proteha y como monumento historico y patrimonio cultural di pueblo di Aruba (23 januari 2008).
 - Crea e condicionnan necesario pa Aruba por bira participe activo na e Tratado Internacional di Derechonan di Persona cu Limitacion (23 di januari 2008).
 - Decreta como orario di cierre 01:00 a.m. durante siman y 02:00 a.m. durante fin di siman pa tur club nocturno sin excepcion (13 februari 2008).
 - Continua cu e proyecto di Downtown Development Corporation pa e centro di Oranjestad garantizando bao tur circunstancia accesibilidad di nos pueblo di Aruba na e infraestructura (20 september 2007).
 - Sostene Gobierno di Aruba den su posicion cu e entradanan di e benta di e accionnan di Plant NV ta pertenece den su totalidad na pais Aruba (20 september 2007).
 - Aserca CAD of otro instancia menciona cu e tarea pa controla y duna conseho riba e cifranan di factibilidad menciona den e diferente rapport di MTBS pa loke ta nan veracidad y realismo (13 november 2008).
 - Institui un comision parlamentario cu mester hasi e preparacionnan necesario pa bin cu un encuesta parlamentario riba e proyecto di Dump na Parkietenbos (8 december 2008).
 - Construi e edificio nobo di e centro di gobernacion na San Nicolas (11 december 2008).
 - Ehecuta mas lihe posibel e proceso pa implementa e Ley pa financiamiento y subsidio di partido politico pa asina e ley dreठा na vigor prome cu eleccion 2009 (13 december 2007)
 - Traha riba e instalacion di "plateaus" na lugarnan unda cu peatonnan, muy en particular nos muchanan, ta hasi uso cu frecuencia di zebrapad, muy en especial dilanti nos scolnan (18 december 2008).
 - Dicidi pa institui un comision parlamentario cu mester hasi e preparacionnan necesario pa bin cu un encuesta parlamentario riba e proyecto di mudamento di e waf di container pa Barcadera (29 december 2008).
 - Disidi pa retira su confiansa den e Minister di Salubridad Publico (3 april 2009)
- Ademas di e cantidad grandi di mocionan aki, fraccion di RED a presenta dos iniciativa di ley:*
- *Cambio di e ley di "overbruggingstoelage" di parlamentarionan,*
 - *Cambio di e ley di BBO pa uno no-cumulativo.*
- Ademas fraccion di RED a pidi 24 biaha pa un 'vragenuur' of pa minister contesta preguntanan por escrito.*

VOTA RED pa:

*Un Gobernacion profesional y dinamico,
Un Parlamento cu curashi cu ta controla gobernacion!*

**Un cantidad di mocion aproba,
cu Gobierno no ta ehecuta,
evitando cu Pueblo ta progresa!**

Preguntanan mas hasi tocante Aruba y Union Europeo

Un di e temanan mas negligisha y menos comprendi ta esun di e relacion entre Aruba y Union Europeo. Ya caba tur Arubiano tin e ciudadanía Europeo y ta bon pa tur hende sa kico e por spera di un cooperacion asina. Pesey Red Democrático ta contesta e preguntanan mas haci dor di ciudadano Arubiano.

Ta Hulanda of Reino Hulandes ta miembro di Union Europeo?

Reino Hulandes ta miembro di Union Europeo y por lo tanto Aruba ta formalmente miembro di Union Europeo. Pesey nos ta ciudadano europeo y asina nos a haya e derecho di voto pa Parlamento Europeo. Dor cu e aplicacion di e tratadonan Europeo a keda ratifica solamente pa e territorio di Hulanda, de hecho Aruba no ta goza di membresia integral di Union Europeo.

Mester cambia e Statuut pa Aruba ta miembro integral di Union Europeo?

No, e Statuut manera e ta kirbi, ta permiti nos pa ta miembro integral di Union Europeo. Solamente Reino Hulandes mester comunica na Brussel, despues cu pueblo di Aruba a bisa 'si' via un referendum, cu e tratadonan Europeo ta drenta na vigor pa henter e territorio di Reino hulandes.

Aruba lo perde su Status Aparte ora e ta miembro integral di Union Europeo?

No, pasobra e hecho cu no mester cambia e Statuut ta garantiza e existencia di nos Status Aparte cu ta ancla den e Statuut.

Aruba mester bira provincia of gemeente di Hulanda ora ta integra den Union Europeo?

No, Union Europeo no ta mete cu e asuntonan constitucional di e paisnan miembro, den e caso aki ta Reino Hulandes ta miembro. E Statuut ta reglamenta e autonomia interno di Aruba y su relacion cu Hulanda y esaki ta keda respeta ora ta bira miembro integral di Union Europeo.

Aruba como miembro di Union Europeo lo perde su florin?

No necesariamente. Nos tin e ehempel di Inglatera cu ta miembro di Union Europeo y cu a mantene su moneda nacional. Dor cu nos economia ta hopi vincula cu Merca ta cumbini Aruba keda cu florin/dollar.

Aruba mester introduci matrimonio di homosexualnan?

No. Tin hopi pais cu ta miembro di Union Europeo y cu no a sigui e ehempel di Hulanda den esaki. Inclusive Turquia, cu ta un pais musulman y cu conose otro costumernan di estilo di bida, kier bira miembro di Union Europeo. Den Parlamento Europeo a keda palabra cu Turquia por keda fiel na su tradicionnan religioso den caso cu e bira miembro di Union Europeo. Asina tambe Aruba por conserva su costumernan y identidad propio.

Lo respeta nos idioma den Union Europeo?

Si. Union Europeo ta garantiza cu e identidad propio di e paisnan miembro ta keda proteha a lo maximo. E cooperacion Europeo ta exactamente basa riba diversidad cultural. Pesey por ehempel Union Europeo ta stimula e proteccion di e idioma Fries na Hulanda. Nos no mester tin miedo di esaki, den Union Europeo lo tin espacion pa nos conserva lok e ta di nos, entre otro nos Papiamento.

Cua ta e bentahanan pa Aruba integra den Union Europeo?

1. Nos ta mantene nos pasport Hulandes vincula cu e ciudadanía Europeo.
2. Nos ta conserva nos Status Aparte.
3. Nos ta garantiza un Estado di Derecho unda husticia ta funciona independiente di politica.
4. Lo tin un clima atractivo pa inversionistanan, ya cu companianan americano y latinoamericano por drenta mercado Europeo via Aruba.
5. Lo tin mas control, y mas control ke men menos corrupcion.
6. Nos lo tin mesun derechonan social y economico cu e paisnan Europeo loke lo eleva nos calidad di bida.
7. E leyman ambiental y otro leyman positivo lo conta tambe pa nos cu e consecuencia cu lo planta respet pa nos medio ambiente.
8. Nos lo bin na remarca pa diferente fondonan Europeo cu lo juda drecha entre otro nos infraestructura, enseñanza y salubridad publico, especialmente tumando na cuenta cu na 2009 ta termina tur ayudo financiero di Hulanda.

Aruba lo mester bai bek den Antias?

No, despues cu e 'si' a gana den e referendum na Corsow, e desmantelacion di Antias ta inevitabel. Antias ta bai pasa definitivamente pa historia, ke men Aruba no por bai den algo cu no ta bai existi mas.

Aruba lo bai keda coloniza atrobe dor di Hulanda?

No, al contrario, dor cu Aruba ta bai cuminsa negocia directamente cu Brussel nos ta bai bira mas independiente di Den Haag. Ademas Union Europeo ta bai controla y coregi Hulanda ora esaki lo por trapa nos derecho.

Aruba lo entrega su autonomia?

No, Aruba ta mantene su autonomia. Reglanan di control financiero di Union Europeo ta conta tambe pa Hulanda, Alemania, Francia etc., y e paisnan aki no a perde nan autonomia. Aruba hasta lo aumenta su autonomia, den e sentido cu Aruba lo bira mas fuerte financieramente.

Ainda BO ta vota pa NAN?

Ban cas bek, NAN a bisa'Bo
Drumi bon, nos no ta laga'Bo.
Pero, B'a spierta cu beslag poni
Y Bo tereno y cas total perdi.

Den secreto y den madrugada
NAN a pasa ley pa redobla
Tur pensioen y tur salario
Di ministro y parlamentario

Sin berguensa NAN a yena NAN saco
Lagando caha di Aruba cu un gran buraco.
Cu NAN plan di pensioen scondi lanza
Berde y Gel a copera bon braza.

NAN a priminti pa representaBo
NAN a scohe pa decepcionaBo.
En bes di Bon Gobernacion
NAN a trece Mas Corupcion.

"Pa pueblo nos ta traha
Hopi placa nos mester"
Pero ora di mara faha
Ta di Bo so NAN conoce.

Tur aña ta pidi mas y ta haya mas
Tur aña ta haya mas y ta gasta mas
Despues di gasta mas ta bolbe pidi mas
Awor ta fia mas pa por gasta mas.

Mil miyon di placa'i pueblo
A somenta y a cria pia
Pero esnan responsabel
Lo bai KIA?, maske ta un dia?

Ta dicon nos hendenan profesional
Cu bon diploma y bon educacion
No por cu politiconan tradicional?
Kisas ta pa tanto corrupcion?

E deporte di nombracion di personal
A bira un fiesta hopi bacanal.
Awor pueblo di Aruba ta yora malai
Pasobra al fin y al cabo, tur placa a bai!

Pa razonnan partidario
den nos stoma a pusha AZV
awor ta un tal Candelario
ta duna remedi pa diaree

AZV y garantia na granel
A laga Aruba casi sin flanel.
A hinca pueblo pisa den problema
Tapando tur cos cu hala di lema.

Cu Ordo y Prosperidad
Lo crea rikeza y caba maldad.
A crea rikeza pa un grupo chikito
Y derecho di hende a keda finito.

Nos pueblo mester kremencha
Pa por cumpr'un pida cos
Mientras Gobierno si ta derocha,
Miyones na un dump na Prikibos

Na dump di Aruba a paga candela
E ministro a haci'e sin ningun cautela.
El a scop, a scupi y a duna bati
Y etica den politica a sali perdi.

Aruba, isla di orguyo y grandesa
Bo curpa en berdad ta un beyesa
Pero pakico ta net San Nicolas
Semper ta bo part'i atras?

Edificionan di gran tamaño
Na tur parti ta wordo construi.
Pero e cunucunan di antaño
Pa semper ta keda destrui

Ora di scohe ta yegando cerca
Relacion cu Reino por yega na su fin
Soñando cu Brazil, Cuba of Merca
No ta sigura mihor cu ya nos tin?

Tin algun auto y cas cu NAN sticker y bandera.
Pero tin hopi mas auto y cas SIN
NAN sticker y bandera.
Pues, tin speransa ainda pa Aruba!!!

ENSEÑANSA Y DEPORTE NA SERVICIO DI ARUBA




Enseñansa ta un derecho universal y consitucional. Enseñansa di calidad ta esencial pa perspectiva di cada individuo y pa

desaroyo di nos economia. Lamentablemte, e efecto di enseñansa na Aruba ta basta abou: casi 35% di poblacion apenas a termina scol basico y 40% a sigui LBO of MAVO. Mas y mihor enseñansa tin bentaha grandi pa comunidad manera mas participacion pa puesto mas halto, menos uzo di bijstand, menos criminalidad, mihor salubridad. Pesey RED lo aumenta e participacion na y nivel di enseñansa.

Pa logra esey, RED lo:

- Introduci enseñansa obligatorio. Asina tur mucha sin excepcion lo bay scol te cu 16 año di edad.
- Destina minimo 6% di nos Entrada Nacional na Enseñansa, reduciendo e atrasonan grandi.
- Seleccion cla di un of mas idioma di instruccion cu un lugar importante pa e idioma maternal.
- Mehoracion di infraestructura di scol, locual ta nifica e.o. airco den tur local y un scol atractivo.
- Un maneho nacional pa fondo pa buki di scol pa minimalisa e gasto halto di buki di estudio.
- Programa instructivo pa futuro mayor pa un bon cuidu y guia di nan yiu.
- Promove lesamento for di edad hoben y pa tur edad.
- Envolvi mayor y alumno mas den enseñansa y haci nan co-responsabel pa exito di enseñansa.
- Haci 'peuteropvang' mas accesibel pa tur hende y yuda desaroyo bon programa pa mucha chikito.
- Pone exigencia halto na scol y docente pa duna e mihor instruccion y guia posibel.
- Atrae mas docente cu lo motiva e.o. a base di un sistema di recompensacion pa nan prestacion.
- Haci tur esfuerzo pa reduci cantidad di alumno pa clas of aumenta cantidad di 'asistente den clas'

- Duna guia na cabesante di scol pa por enfrenta mihor e exigencianan complica di un scol moderno.
- Duna scol mas autonomia y medio pa hiba nan maneho dentro di e normanan stipula pa Gobierno.
- Ehecuta e programa di 'Club escolar' na unda:
 - * ta duna tur mucha guia pa traha nan 'huiswerk';
 - * tur mucha ta participa obligatoriamente na un actividad deportivo, cultural of artistico



riba nivel halto, sea como participante, instructor of organisador;

** tur mucha ta duna minimo 1 año di servicio obligatorio na fundacion pa asina siña conoce*

necesidad di comunidad y aporta na solucion di e problemanan.

- Expande posibilidad pa estudio avansa na Aruba, e.o. pa medio di 'Open Universiteit'.
- Expande posibilidad pa 'educacion permanente'.

Deporte ta importante pa e sentido positivo di bienestar, pa salud y disciplina di e participantenan. Pa comunidad, deporte masal por nifica un rebaho grandi di e gastonan di salubridad. Pesey, RED lo:

- Hiba un campaña y incentivo pa motiva hende haci di deporte un prioridad den nan vida.
- Crea infraestructura pa haci actividad fisico facil y atractivo pa tur hende, p.e. Caminda pa bicicleta.
- Ehecuta e programa di Club escolar pa involvi hubentud mas tanto posibel na deporte.
- Stimula organisacion deportivo pa ofrece programa deportivo atractivo riba varios nivel y pa tur edad

PASTOR DEN POLITICA

Na varios pais den nos region, na unda corrupcion (tawatin un influencia devastador riba desaroyo di e pais(nan), (tawatin hopi yamada pa hende religioso drenta politica. E motibo ta cu ora corrupcion den gobierno yega un punto inaceptabel, e pueblo ta considera e religiosonan como e unico hendenan cu no ta susceptibel pa corrupcion. Desde cu esaki tambe a pasa na Aruba, esta cu un pastor a drenta politica pa combati corrupcion, el a bira un problema grandi. No tanto pa e ciudadano, sino pa e (partido) politiconan cu a mira un pastor den politica como un menasa grandi pa nan manera di hiba politica.

A resulta cu en berdad esaki a bira un problema grandi pa NAN, pasobra mientras cu antes por a gaña ciudadano dor di grita cu e otro partido(nan) a haci su/nan mes culpabel na corrupcion, e pastor aki a tuma accion y a pidi Ministerio Publico pa di berdad investiga posibel acto di corrupcion y castiga esnan culpabel. Ya cu esey nunca tawata nan intencion', esta pa en berdad caba cu corrupcion!

Ademas e politiconan tawata culpa otro di nombra 'friends & family' den e aparato gubernamental, pero ora e partido di e pastor a propone pa yega na un acuerdo pa elimina e custumber ey, tur otro partido a hala atras y a keda keto, pasobra nunca tawata nan intencion pa en berdad caba cu e tradicion ey.

Pa gana simpatia den pueblo, tur e partidonan ta culpa otro di a crea privilegio pa nan mes, pero na momento cu e pastor ta expone tur e privilegionan di e clase politico (manera e areglo di pensioen y overbruggingstoelage, ademas di e biahenan pa Parlatino), tur a rabia cu ta saca nan secretonan bon warda y esey tampoco tawata nan intencion.

Pa defende nan mes, tur a busca manera pa desacredita e pastor na tur sorti di manera. Y como cu a resulta cu no por culpa e pastor di ta corrupto, a purba di dun'e un imagen negativo, pa asina bah'e na mesun nivel cu e politiconan 'normal'. A haci hopi esfuerso pa logra esaki, asta dunando informacion mentiroso, cu cada bes atrobe a keda desmenti cu prueba palpabel. Nos ta duna algun ehempel:

E MENTIRANAN
Pader Lampe a kima auto dia di accion di Setar
Pader Lampe ta un porco cu ta hule corrupcion na tur poz cu e ta pasa
Pader Lampe ta persona non grata na Mexico
Pader Lampe ta un corrupto cu ta saca su placa pa campaña for di lugar straño
Pader Lampe a hinca Af. 700.000,- di Comision di Berdad den su saco
Pader Lampe ta sali for di un organizacion cu ta abusa di mucha chikito
Pader Lampe a acusa Henny Eman y Otmar Oduber falsamente a base di persecucion politico
Pader Lampe ta aliado di Brinkman y su partido PVV



E HECHONAN
Na ningun manera Pader Lampe ta envolvi den kimamento di auto (ex-comisario van de Straten)
Gobierno di MEP a core haci adaptacion na e proceso incorrecto di waf pa evita problema hudicial.
Pader Lampe ta sigui ricibi invitacion oficial di estadonan di Mexico pa duna lectura
RED ta e unico partido cu ta duna cuenta di su maneho financiero y cu ta pusha pa implementa e Ley di financiamiento di Partido.
Pader Lampe y mayoria di miembro di CdB no cobra ni ricibi ningun cen (segun Departamento di Finansas) y Departamento di Finansas mes a uza mayoria parti di e placa presupuesta pa nan propio actividadnan.
Cu otro palabra, mester rechasa Papa di Roma, tur cardinal, (arzo)obispo y pastor rond mundo?!?!?
CdB a entrega keho contra 8 persona so, incluso ex-lider di AVP (Tico Croes) y tur sin excepcion a wordo sentencia. Hues a dicta tambe cu persecucion politico no a hunga ningun rol den trabou di Ministerio Publico
RED ta aliado di Groenlinks, cu ta e partido na Hulanda cu mas ta critica e partido di Wilders/Brinkman

RED DEMOCRATICO DEN GOBERNACION

Durante e ultimo 4 añanan, tanto AVP como MEP a haci tur esfuerzo pa convence pueblo di Aruba cu sea RED ta liga cu MEP (segun AVP y su medionan di comunicacion comprometi) of cu AVP (segun MEP y su medionan di comunicacion comprometi).

Pa medio di esaki RED ta declara enfaticamente cu pa RED no ta haci ningun diferencia cua partido lo ta e partner di coalicion: tur dos partido a haci nan mes culpabel na mal gobernacion. En realidad no tin diferencia y pues no tin preferencia.

Como cu tur dos partido ta carga e mesun responsabilidad pa e situacion malo di Aruba, causa dor di e gran cantidad di nombracion politico y mal maneho financiero, en realidad tur dos partido ta carga e mesun obligacion pa aporta na e solucion, sin tira culpa riba otro.

RED tin pleno confiansa den su capacidad na aporta na solucion di e problemanan di Aruba, a base di experticio di e ministernan profesional cu e lo propone. E 'vakministernan' aki no ta traha na beneficio di partido RED of otro partido politico, sino 100% pa Aruba so. Esey ta e diferencia grandi di RED den politica y e solucion cu RED ta ofrece pueblo di Aruba.

KICO ASINA RED LO NIFICA PA BO COMO CIUDADANO?

- Como cu RED lo introduci un transparencia total den funcionamiento di Gobierno y derecho igual pa tur hende na unda lo elimina privilegio, ningun hende of instancia mester biba cu miedo mas cu su critica lo tin represaya p'e. Tur ciudadano di Aruba por fin lo por biba y traha y expresa nan mes sin miedo!
- Gobierno lo bira mas chikito, eficiente y efectivo bou di RED. Esey ta nifica cu mas placa ta bin disponibel pa inverti den economia di Aruba y den mehoracion di calidad di e servicionan di Gobierno. Esaki ta genera mas placa. Consecuentemente poco poco por baha belasting lo cual ta nifica cu ciudadano lo tin mas placa disponibel pa mehora su calidad di bida.
- E filosofia y trabou di RED lo tin como consecuencia cu e ciudadano lo bira mas conciente di su (responsabilidad pa cu su) salud y lo traha duro pa mehora su salud. Hunto cu su maneho pa naturalesa y medio ambiente, henter Aruba lo bira un isla saludabel den tur sentido.

BO tambe lo yuda RED yuda'BO y comunidad henter?

Of lo bo sigui yuda NAN?

Shon Mè

Shon Mè ta representa partido MEP.

Originalmente MEP ta para pa Movimento Electoral di Pueblo.

Lamentablemente, den practica el a transforma den **Mas Entrada Pami.**

Asina el a bira e complementario di **AVP**



Shon Pé

Shon Pé ta representa partido AVP.

Originalmente AVP ta para pa Arubaanse Volks Partij.

Lamentablemente, den practica el a transforma den **Arubaans Volk Platzak.**

Asina el a bira e complementario di **MEP**



100% Aruba

www.red.aw